

**Ramai dermawan tanda kemajuan negara – Muhyiddin  
Utusan Online  
Ogos 08, 2011**



MUHYIDDIN Yassin (tengah) membetulkan kopiah dipakai Mohd. Hanif Amir, 5, pada majlis bersama Anak-Anak Rumah Amal Kasih Bestari di Putrajaya, semalam. Turut hadir, Noorainee Abdul Rahman dan Abdul Rahim Mohamad.

---

PUTRAJAYA 7 Ogos - Tan Sri Muhyiddin Yassin menyifatkan wujudnya ramai individu dan syarikat korporat yang dermawan di negara ini sebagai petanda kepada kemajuan dan pembangunan ekonomi negara.

Timbalan Perdana Menteri berkata, ia juga satu hakikat bahawa rakyat negara ini hidup dalam keadaan yang begitu baik dan tidak diganggu oleh apa-apa masalah sebagaimana di sesetengah negara Islam yang lain.

"Di Malaysia, kita bertuah kerana terdapat ramai individu dan syarikat korporat yang bermurah hati menyumbang kepada mereka yang memerlukan.

"Ini selaras dengan usaha kerajaan yang bukan hanya mahu melahirkan generasi berilmu tetapi mewujudkan masyarakat yang dapat sama-sama menyumbang kepada pembangunan negara," katanya.

Beliau berkata demikian ketika berucap di Majlis Berbuka Puasa Bersama Anak-Anak Rumah Amal Kasih Bestari anjuran EDEN Inc. Berhad di sini, hari ini.

Turut hadir isteri Timbalan Perdana Menteri, Puan Sri Noorainee Abdul Rahman dan Pengerusi Eksekutif EDEN Inc Berhad, Tan Sri Abdul Rahim Mohamad.

Pada majlis itu, Muhyiddin menyampaikan sumbangan sebanyak RM5,000 kepada Rumah Amal Kasih Bestari yang terletak di Kampung Melayu Subang, Petaling Jaya, Selangor.

Muhyiddin memberitahu, bersempena sambutan bulan Ramadan ini, beliau menyeru agar semangat perpaduan tanpa mengira kaum dan agama di kalangan rakyat negara ini diperkukuhkan lagi.

"Akhir-akhir ini, kita merasai keadaan yang kadang-kadang membimbangkan ekoran pelbagai isu sensitif yang dibangkitkan oleh pihak-pihak tertentu.

"Dengan kesempatan menyambut bulan Ramadan ini, kita dapat mengelakkan daripada mana-mana pihak yang mungkin boleh menyebabkan hubungan antara masyarakat Islam dengan yang lain menjadi tegang," katanya.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2011&dt=0808&pub=Utusan\\_Malaysia&sec=Muka\\_Hadapan&pg=mh\\_03.htm](http://www.utusan.com.my/utusan/info.asp?y=2011&dt=0808&pub=Utusan_Malaysia&sec=Muka_Hadapan&pg=mh_03.htm)